

Date – 31/08/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Power and Electricity Minister Pu F. Rodingliana chuan Mizoramah Hydel Project thar siam tum a nih thu a sawi.
2. Bairabi khawtlang hruaitute chuan Home Minister Pu K. Sapdanga hnenah, ILP Check Gate chu sorkar hnuaiah dan anga changtlung zawka din an duh thu an thlen.
3. Public Health Engineering (PHE) Minister Prof. Lalnilawma chuan Jal Jeevan Mission-ah Mizoramin Project 852 a thawk tih a sawi.
4. Prime Minister Narendra Modi chu nimin khan China rama Tianjin a thleng a, Shanghai Cooperation Organization Summit vawi 25-na ah a tel dawn a ni.

<><><>

HYDEL PROJECT

Power and Electricity Minister Pu F. Rodingliana chuan Mizoram ah Hydel Project thar siam tum a nih thu a sawi.

Assembly Session neih zawh taka MLA Pu K. Laldawngliana zawhna ziaka a channaah Minister chuan, Hydel Project thar siam tum a nih thu sawiin, Tuirini SHP (24MW) chu Sesawng ram chhungah siam tum a nih thu a sawi.

Hmalak tawh dan hrang hrang sawi zuiin, Externally Aided Projects (EAP) atanga thawh turin Department of Economic Affairs (EAP), Ministry of Finance in approval a pe tawh a ti a. Loan hi New Development Bank atanga puk tum a ni a ti bawk.

Zawhna chhanna atanga a lan danin, a enkawltu tur Project Monitoring Unit (PMU) chu din a ni tawh a. Department lam atangin project hi thawh thuai a nih theih nan Department leh NDB te an in dawr mek a ni, a ti.

P&E Minister hian an department-ah hn a thawktu an indaih lo hle a ni tih sawi bawkin, hei hi a chhan lian ber chu thawktu (Line Staff) indaihloh vang a ni a ti. Power sem chhuahna network system tih len a, he tih lai hian Pension leh Thihna

avang ten line staff an tlem tial tial bawk a, a thlakna tur thawktu lak belh a awm meuh loh vang a ni, a ti.

(Voice Cast)

(Minister hian Aikal lak tih tawpin a nghawng chungchang chhangin, Office hna ah harsatna an tawk tih a sawi a, a bik in Line staff ah harsatna an tawk nasa hle nia sawiin. A chhan chu aikal la te kha kum lama upa tawh leh hrisel tawk loh avanga aikal la an ni tlangpui a, aikal a an lak te kha kum lama naupang leh zuanzang zawk te an nih avangin Department tan an tangkai hle tih a sawi bawk.

<><><>

NH NO 06

Champhai leh Aizawl inkar kawng National Highway No.06 chu Champhai dai, Chalbawiha Junction Police Checkgate thlang lawkah leiminin a hnawh.

Leimin hi Lei laihna khawl hmangin thenfai ni mah se, lung leh lei tla a awm reng a. Nizan khan Car 1 leh Bike pakhat chu leimin hian a delh a, hliam tuar erawh an awm lo thung.

National Highway No.06 hêlna Chhungte khaw kawng, Champhai atanga Aizawl panna kawng hlui, Champhai atanga KM 5-6 a hla chu lirthei tlan theih loh kawng a min bawk a.

Tun dinhmunah kawng pahnihah te lirthei a tlan tlang theih loh avangin kawng hi a ping rih a, Lung a tlak reng avangin Lei laihna khawl a lut ngam lo a. Champhai District SP chuan thuchhuah siam Kawng hlui zawk hi khar a nih thu a tarlang a. Kawng thar zawkah pawh lirthei te tlan luh tum lo turin a hriattir bawk.

National Highway No.06 hi vawiin lamah lirthei kal tlang theiha thenfai tumin hma lak leh a ni ang.

<><><>

HOME MINISTER

Bairabi khawtlang hruaitute chuan Home Minister Pu K. Sapdanga hnenah, ILP Check Gate chu sorkar hnuaiah dan anga changtlung zawka din an duh thu an thlen.

Home Minister Pu K. Sapdanga hian nimin khan Kolasib District leh Hailakandi District, Assam inrina hmun, Bairabi Sub-Division a tlawh a, Mizorama rel kawng thar chu hmasawna ropui tak a nih rualin state dang atangin mikhual tam zawk rawn luhna kalkawng a hawn zauhsak dawn thu leh chumi piah lamah a let zawnga ruihhlo lo luhna kawng pakhat a nih theih thu a sawi a. Chu vang chuan dan hnuaiah Mizorama rawn lutte felfai taka chhinchhiah a an luh theih nan ILP pekchhuah kawngah fimkhur zawka hma lak a tul thu leh heng thil hrang hrangte hi a hmuna chengte nen sawi ho a tul avanga tlawh a nih thu a sawi a ni.

Home Minister hoa inkawmhonaah Bairabi khawtlang hruaitute chuan ILP Check Gate hi Sawrkar hnuaia dan anga changtlung zawka din a nih thuai theih nan hmalak ni se tih te, ILP Check Gate hela Tlawng dung atanga Mizoram rawn lut thin te dan nan Tlawng dunga ILP check Gate awm a tulzia thu te leh Bairabi leh a chhehvel a hnamdang ina awmhmun an lo khuar thin te dap chhuah kawngah

sorkarin chak takin hma la se an duh thu Home Minister hnenah hian an thlen a. Heng bakah hian State dang atanga dan lova lo lutte leh dan phal loh bungrua lo lut te chak zawka dapchhuah leh ven dan kawng sawi ho a ni bawk.

He hunah hian Home Secretary Pu Vanlalmawia chuan Mizoram a Rel lo lut tur avanga Sorkar inbuatsaihna hrang hrang te sawiin, Rel Station 5 zinga 4 chu Kolasib district chhunga mi a nih thu a sawi a. Railway police din chungchang a sorkar ruahmanna hrang hrang te, ILP Counter kalpui a pawimawh dan leh ruahmanna te, hemi chungchangah sensitization neih dan tur ruahmanna siam a nih thu te a sawi lang bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

JAL JEEVAN MISSION

Public Health Engineering (PHE) Minister Prof. Lalnilawma chuan Jal Jeevan Mission-ah Mizoramin Project 852 a thawk tih a sawi.

Assembly Session neih zawh takah khan MLA Clement Lalhmingthanga zawhna ziaka chhangin PHE Minister chuan, scheme 842 chu thawh zawh a ni tawh tih a sawi a, mahse fund hmuh kim a la nih loh avangin scheme zawh tawh 842 zinga 368 chu financially a la zawh loh a ni tih a sawi bawk.

Minister Prof. Lalnilawma chuan India ramah Mizoram chu Jal Jeevan Mission-ah hna thawk tha zingah a tel tih a sawi bawk a ni.

<><><>

LAWNGTLAI ROAD

Kumin May 30 zana Lawngtlai Bazar Veng leh Chandmary Inrinna lai National Highway kawngchhak lama leimin leh In chim pasarih chim vanga Veng pahnih atanga DC Office leh hmun pawimawh dang panna kawng ping chu siam mek a ni.

Bazar Veng huam chhung bikah chuan Village Council hmalakna in Auto Rickshaw kaltheihin kawng hi sialtlang a lo ni tawh a, Lawngtlai West bialtu MLA, Pu C. Ngunlianchunga ruahmannain, LMV chin kal theih turin a MLA Fund hmangin kawng tihzau leh kawng chhuat siamthat hna hi nimin atang khan thawh tan a ni a, kawng chhuatah thir zamin, Cement Concrete hmangin kawng chhuat hi siam a ni.

Chandmary veng lam atanga DC Office, District Hospital leh Office leh hmun pawimawh dang panna kawng ping pawh, bialtu MDC, LADC a Executive Member Pu C. Lalsawmzuala hmalakna in sialtlang a ni tawh a, lirthei kal theihna turin kawng chhuat tih muk leh tihual a la ngai a, hna hi thawh tuan theih a nih chuan karleh lam chuan Chandmary lam atanga kawng sial pawh, LMV chin kal theihin peih hman beisei a ni.

Nimin khan LADC a Executive Member pahnih Revenue enkawltu Pu Lalropuia Chinzah leh PWD enkawltu Pu C. Lalsawmzuala ten kawng sial mek hi a hmunah tlawhin, mipui tan kawng pawimawh tak siammek a ni chu lawmawm an tih thu an sawi.



PM MANN KI BAAT

Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 125-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.



PM at SCO

Prime Minister Narendra Modi chu nimin khan China rama Tianjin a thleng a, Shanghai Cooperation Organization Summit vawi 25-na ah a tel dawn a ni. Vawiin atangin Summit hi tan a ni ang a, Prime Minister hian ni hnih chhung aw h tur SCO ah hian a tel dawn a ni. China tlawhna chungchang ziaak tu Akashvani correspondent chuan Prime Minister chu hruaitu dangte nen regional security, connectivity, sustainable development, leh khawvel pum huap thawhhona ang chi thil hrang hrang an sawi ho dawn tih a sawi. Summit-ah hian kum 25 chhunga an pawl hlawhtlinnate thlirlet a ni ang a, kum sawm chhunga hmasawna tur ruahmanna pawh siam a ni ang.

China hian SCO Summit hi a vawi ngana atan a thleng dawn a, President Xi Jinping-a'n a kaihruai dawn a ni. Ram hruaitu 20 chuang leh international organization hrang hrang hruaitu 10 chuang tel tura beisei a ni a. He huna tel zingah hian Prime Minister Narendra Modi leh Russia President Vladimir Putin te pawh an tel a ni.

